

**INATSIARTUT
OMBUDSMANDIATA
UKIUMOORTUMIK
NALUNAARUTAA
2000**

24 - 4 Arnamat annersarneqarsimasumut taassumalu meeraanut ikiorsiineq pillugu suliami isumaginninnermi oqartussaasut pisussaaffii.

A-p uiminit annersarneqarnermi kingorna napparsimmavimmi uninngasariaqarsimasup kommunip K1-ip aamma K2-p immi-nerminik ikiorsiisimanagerat naammagittaaliuutigaa.

A-p kommunimi K3-mi initaarnissaanut periarfissai pillugit K1-ip A-mut siunnersuina Ombudsmandip isornartorsiorpaa, Ombudsmandimi oqarmat pisortanit ikiorsiissutit pillugit Inatsisartut peqqussutaanni § 11-mi ikiorsiinissamat ilitersuinissamullu pisussaaffik K1-ip malinngitsoorsinnaanngikkaa, pisussaaffiup K3-miinnera innersuussutigalugu.

Ombudsmandip K2 isornartorsiorpaa, taassumani annersaanerup kingorna A paaseqatigalugu meeqqat angerlarsimaffiup avataanut inississimammagit, tamatumali kingorna meeqqat A-p uianut angerlartissimallugit, Ombudsmandimi isumaqarmat K2 angerlartitsisoqassanersoq naliliiniarnermini inatsisinik unioq-qutitsinani A-p uiata angerlartitsinissaq pillugu suliami angajoqqaatut oqartussaassutimik tigungmiaqartutut soqutigisai pingaartillugit isiginiarsinnaanngikkai.

Tamatumunnga peqatigitillugu Ombudsmandip K2 isornartorsiorpaa meeqqanik inuusuttunillu ikiorsiisarneq pillugu Inatsisartut peqqussutaat malillugu ikiorsiiniutinik allanik ikiorsiiniartoqarnissaa isumaliutersuutigisimanngimmagu.

Kiisalu naggataatigut Ombudsmandip K2 A-mut naammaginar- tumik qajassuussisumik iliuuseqarfiginnissimannginnerarlugu isornartorsiorpaa. (J.nr. 11.24.20.9./19-97)

K1-imi isumaginninnermik ingerlatsivimmit nammineq meeqqamilu 27. november 1996-imit 5. januar 1997-imut kommunimi najugaqarnerminnut atatillugu pisortanit ikiorsiissutinik ikiorumaneqarsimannginnertik kiisalu K3-mut nuunnissaminut periarfissaminik kommunimit kukkusumik ilitser-

sorneqarsimanini pillugit A-p naammagittaalliuutaa 7. marts 1997-imi ti-guara.

Tamatumunnga peqatigitillugu kommunip K2-p, A-p najugaqarfigigalla-gaata, ikiorsiinera A-p naammagittaalliuutigaa.

K1 pillugu naammagittaalliuut makkununnga tunngasuvoq:

7. maj 1998-imi kommuni nalunaarfigaara suliaq imaattoq suliarilersi-magiga:

"- Kommunimi inunnik isumaginninnermi siunnersortimik S-imik 30. december 1996-imi oqaloqatiginninnini pillugu naammagittaalliuortup imaattut oqaatigai:

"... isumaqatigiissuteqarfigeerlugu 30. dec. orniguppunga. Iserama ... napparsima-soq paasivara, allamullu S-imik atilimmut isertussanngorluna. K3-mi sumi na-jugaqarnissarput paasiniartuaraluarpara, K3-mimi inigisarput 1. maj 97-ip tu-ngaanut allamut attartortikkallarnikuugatsigu, kisianni sullissisoq S akivoq uagut inigisarput ingerlaannaq tigoqqissinnaagipput. Eqqissineruvunga, inigisatsin-ullu ingerlaannaq isertussanngornerput nuannaarutigalugu, kisianni sunaaffa taamaassanngitsoq."

Taamaalilluni naammagittaalliummi kingusinersukkut takuneqarsinnaavoq naammagittaalliuortup K3-mi inigisaanik allamut attartortitsigallarneq sulii taamaati-tinneqarsimanngitsoq.

Taamaattumik naammagittaalliuutip tassunga tunngasortaa nassuiaateqarfigeq-qullugu kommuni qinnuigissavara.

Naammagittaalliuortup K3-mi inigisaminut nutsinnginnerani inigisaminullu nuus-sinnaanermik ilisimatinneqannginnerani naammagittaalliuortup K3-mi inigisaa pil-lugu misissuinerit pingaartumik suut naammassineqarsimanersut kommunimut nas-suiaateqarfigeqquussavakka.

Naammagittalliuutip tassunga tunngasortaanik suliaqarninnut atugassatut naam-magittaalliuortup pillugu isumaginninnermik ingerlatsiviup allattugaatai tamaasa kii-salu allanik naammagittaalliuortup isumaginninnermik ingerlatsivimmuut saaffigin-ninneri pillugit naammagittaalliuortup pillugu suliamut allattuisoqarsimappat, taakku maani misissugassanngorlugit maanga nassiuuteqqullugit kommuni qinnuigissavara.

- Kommunimi inunnik isumaginninnermi ingerlatsiviup allattugaataanit, qupper-neq 3-mit, 10. december 1996-imeersumit, erserpoq kommunip naammagittaalli-ortoq pisortanit ikiorsiissutinik itigartinneqarneranik oqaasiinnakkut nalunaarfi-gisimagaa, itigartitsinerlu taanna "kommunip sorliup akiliisussaanerata sulii ilua-mik paasineqarsimannginneranik" tunngavilersorneqarsimasoq.

Aammattaaq kommunip aalajangiinera kommunip K3-mut allagaani ...-imik nor-mulinni 2. december 1996-imeersuni takuneqarsinnaavoq.

Taamaattumik kommuni qinnuigissavara aalajangerneq taanna erseqqinnerusu-mik nassuiaateqarfigeqqullugu, matumani makku ilanngullugit:

- pisortanit ikiorsiissutinik itigartitsineq inatsisitigut tunngavissaq suna tunngavi-galugu naammagittaalliuortumut nalunaarutigineqarsimanersoq,
- itigartitsineq allakkatigut naammagittaalliuortumut erseqqissumik nalunaarutigi-neqarsimanersoq (taamaattoqarpat itigartitsissutip assilinera nassiuuteqqullugu kommuni qinnuigineqarpoq),
- itigartitsinermut tunngavilersuut suna naammagittaalliuortumut tunngavilersuuti-gineqarsimanersoq,
- naammagittaalliuuteqartoq itigartitsinermut atatillugu allaffissornikkut naamma-gittaallionnissamut periarfissat pillugit naammagittaalliuortup ilitersorneqarsima-nersoq, tak. isumaginninnermut tunngasut aqunneqarnerat aaqquissuussaanerallu pillugit Inatsisartut peqqussutaat."

A qitornanilu pingasut 25. november 1996-imi K2-mit K1-imut nuupput, tamanna pivoq A-p uiminit, avinnissaa tamatuma nalaani qinnuteqaatigisaminit, persuttarneqarsimaneranut atatillugu. Anaanani K1-imi najugaqarmat K1-imut aallarpoq.

K2 25. november 1996-imi K1-imi isumaginninnermik ingerlatsivimmut imaattunik allagaqarpoq:

“Matumuuna nalunaarutingissuarput qulaani pineqartoq meeraalu pingasut ulumi ulloq aallartinneqarmata K2-mit K1-imut.

Angerlartinneqarnerannut pissutaavoq, A-p uini Politiinut suliaassanngortinnikuugamiuk, aammalu avinnissamik qinnuteqarnikuulluni.

Aappariit K2-miinnerminnut pissutigaa uviusoq ilinniartuugami. Ullorli 26 10 96 A uviminiik persuttagaalluni Napparsimavimmut unitsinneqarsimavoq, kingornalu Sanamut aallartinneqarluni. Persuttarneqarami niaqqumigut annertuumik annersinneqarsimavoq, alleruviarluni massakkullu kingutai saviminertaqarlutik aammalu talia napisimalluni gipseqarpoq.

Aappariit qimannginnermini sullissisumik ilaqartillugu oqaloqatigiisinnegartarput, naggataagullu paaseqatigiilluinnarlutillu avissaarput.

A uviniilu K3-meersuupput, aningaasartuutillu K3-mut ingerlateqqinneqartarlutik. K3-mi sullissisoraat ..., suliarlu sullissisuvata malinnaaffigaa.

Matumuuna K3 sinnerlugu, pineqartoq meeraalu qinnuteqaappagut Isumaginninnermi Allaffik aqutingalugu inissaanik ikiorserneqarnissaannik.

Annertunerusunik paasissutissanik perusukkussi K3 attaviginnassuarsi.”

A isumaginninnermik ingerlatsivimmut 26. november 1996-imi saaffiginnippoq, ingerlatsiviullu ulloq taanna allattugaani ima allassimasoqarpoq:

“Qulaani taaneqartoq saaffiginnippoq, ippassaammat K1-imut tikissimalluni, pisartagaqartussaagamigooq, pisartagassani tigujumavai.

Pineqartoq inniminniisimanani, ulapinnerullu nalaani takkummat, piumaffigaara, ualikkut inuerukkuma takkuteqqeqqullugu. Oqaatsit naammaginninngissutit atorlugit ingerlavoq.

Ualikkut isersimasora kingulleq animmat, ingerlaannaq iserniaraluaq, piumaffigaaraa utaqqilaaqqullugu naammasseqqaassagama, tassani aamma assut kamassimavoq, oqalualluni pingasunngorsiiigiga pingitsoorniassammat.

Tamanna ataqqinninnginneq, sulisutut akuersaarneqarsinnaanngilaq.

Pineqartup K3-mi ... saaffigeqquaa.

Pisimasoq nalunngimmagu, imaluunniit ... K2-mi sullissisorisimasani.

K3-mut tunngasoq.

K3-mii ... sianerfigalugu paasiniaaffigaara, taassumalu K2 paasiniaaffigeqquaa, taakku pisimasoq nalunnginnerummassuk. Taamaattorli K3-meersuummat aningaasatigut ikiorsinnaqqullugu sap. ak. 291,- kr. Meeqqamullu 175.- kr. Pingasunik qitornaqarmat, katillugu 816,- kr ikiorseqquaa telefonikkut, piaartumik allagaqassalluni.

...”

Allakkani 2. december 1996-imeersuni telefaxikkut nassiinneqartuni takuneqarsinnaavoq K1-imi isumaginninnermik ingerlatsiviup utertitsilluni taarsiinissaq pillugu neriorsuummik K3 piumaffigisimagaa.

K3 9. december 1996-imi imatut akivoq:

“Qulaani pineqartoq pillugu telefax-ikkut ulloq 02.12.96 saaffiginnissuteqarsimavusi pisortatigut ikiorserneqarnissaannik uppersaammik qinnuteqaallugu.

Pineqartoq K2-mit K1-imut nuutinneqarsimavoq, naak maani K3-mi ...-mi najungaqaraluarluni, inigisartillu 1. maj 1997 tikillugu attartortisimallugu.

Ulloq 9. dec. 96 INI A/S-mut paasiniaasimavunga qanoq periarfissaqartiginersaq najungarisaminnut utersinnaanerannik, imatullu nassuiaanneqarpunga

1. A-p kissaatigiguniuk inertik tigoqqissallugu attartuisuni akuersitillugit sukkulluunniit tigoqqissinnaagaa.
2. piffissaq aalajangiunneqarsimasoq sioqqullugu inini tigussaguniuk qaammatit pingasut sioqqullugu nalunaareersimaguni tigusinnaagaa.

K3-mi inunnik isumaginninnermi allaffimmiit kissaatigineqarpoq pineqartoq iki-orserneqassaguni iluamik nalunaartariaqartoq siunissami qanoq piniarnerluni, maanga K3-mut uteqqinniarnarluni, imaluunniit K1-imut nuunnerluni.

...”

K1-ip kommuniani isumaginninnermik ingerlatsiviup allattugaanut ilasut 10. december 1996-imeersoq imaattoq tamatuma kingornagut atuarneqarsinnaavoq:

“...

Kommuni akiliisussaataitaasoq:

A K2-mi pisortanit ikiorsiissutinik inuussuteqarsimavoq. K2-p oqarnera malillugu ikiorsiissutit taakku K3-mit utertillugit akiligassaapput, A-mi K3-miummat, kisianni K3 taamaaliornissamat K2-mut allakkatigut nalunaaruteqanngisaannarsimavoq. Akileeqatigiittarnissaq K2-p K1-illu akornanni oqaasiinnakuugunartumik aaqinneqarsimavoq. Taamaattumik massakut nalunarpoq kommuni sorleq akiliisussarpiaanersoq. K1 isumaqarpoq K2 akiliisussaasoq, K3-li isumaqarluni pineqartoq K3-liartinneqartariaqartoq.

Ineqarneq:

Pineqartoq anaanamini najugaqarpoq. Ilaqutariit K3-mi ineqaraluarput. Taanna massakut attartortinneqarpoq, attartortitsinerli atorunnaarsinneqarsinnaavoq, taamaalliluni A 1.4.97-mi isertersinnaanngortillugu. Tamanna arnap taassuma kissaatiginnigilaa, K1-imiiginnarumagami - tassanili namminerisaminik inigisaqarani.

Massakut:

Sullissisup isumaginninnermilu allaffimmi pisortaq pineqartoq ullumi oqaloqatigaat, taannalu K1-imiiginnarnissaminik kissaateqarpoq. Pisortanit ikiorsiissutisinisaminut itigartitaasimavoq, kommunimi sorleq akiliisussaviunersoq sulii iluamik paasineqanngimmat.

Isumaginninnermi allaffik isumaqarpoq K2 aallartitsisuusimasutut akiliisussaviunersoq.

Arnaq oqarpoq pisortanit ikiorsiissutinik itigartinneqarnini pillugu borgmesteri oqaloqatigisussaallugu.

Pineqartoq K3-mut angerlarnissaminut billettamik neqeroorfigineqarsimavoq, pi-umasimanaguli. K3-mi ... isumaqarpoq K3-muinnaq billettelerlugu angerlartinneqartariaqartoq.

Naliliilluni eqikkaaneq:

Kommuni sorleq akisussarpiaanersoq iluamik paasineqartinnagu pisortanit ikiorsiissutit tunniunneqarsinnaanngillat.” (Atorfeqarfimmi nutsigaavoq.)

12. december 1996-imi ilisimatitsissutigineqarpoq A kommunimi isumaginninnermut ataatsimiititaliap siulittaasuanik oqaloqateqarsimasoq.

Oqaloqatigiinnerup taassuma imaqarniliornerani imatut allassimasoqarpoq:

“...

Anaanakkumini najugaqarput. Maanna inuit 14-iupput. Ernera ... Rigshospitalili-artartoq ukiumut arlaleriarluni, aanakkuminiittusoq najugaqaqataavoq. ... amerlavallaanik najugaqateqaqquneqanngilaq. Sapaatip-akunneranut pisartagai K3-meersut unitsinneqarsimapput, meeqqat pisassai ilanngullugit. “..” –mi inissaqassagunalaruput - sagsbehandlerilli pitsaanerutissimavaat K3-mut uterpat.

Aningaasaateqaqqanngivipput - aamma anaanakkui akunnattoortaramik, Inigisaminni tattuteqaat. Suliaq piaartumik suliarisariaqarpoq. SIK-mi ilaasortaanaera amigarpoq.”

Ulloq taanna K1-ip K2 qinnuigaa kommunit akunnerminni akiliiffigeqatigiittarnissamut pisussaaffii pillugit Inatsisartut peqqussutaat malillugu utertitsilluni akiliuumanerluni nalunaaruteqaqqullugu.

Tamatuma kingorna ingerlatsiviup allattugaani 13. december 1996-imeersuni imatut allassimasoqarpoq:

“Ataatigut atsiortup K2-mi inunnik isumaginninnermi ingerlatsivik attaveqarfigaa isumaginninnermullu siunnersorti ... oqaluullugu, taannalu oqarpoq K3 suleqatigalugu taarsiinissamik oqaasiinnartigut neriorsorneqarsimalluni, taamaattumik K2-p K3 sinnerlugu ilaqutariit ikiorsiissuteqarfigisimavai, K3-mut akiligassanngorlugit nuunneqartussanik aningaasatigut ikiorsiissuteqartoqarpoq.

Ullumi ulloq inersimasumut ataatsimut meeqqanullu pingasunut inuussutissatut akilersuutunik, 2.604,- koruuninik, K2-mut akiligassanngorlugit nuunneqartussanik akuersissuteqartoqarpoq, piffissamut 9/12 - 26/12.96-imut.

Utertitsilluni taarsiinissamik K2-mit neriorsorneqarnissamik oqaasiinnartigut itigartinneqarpeq pillugu SD-mut naammagittaalliutissaq suliarineqassaaq.

Ullumi ulloq neriorsuutigineqarpoq ilaqutariit “...-mi” inisimalersinnaasut, akilernissaa K1-imut akiligassanngorlugu nuunneqartussamik.”

K1-imi kommunip Isumaginninnermik ingerlatsiviani allattukkat malilugit A ingerlatsivik 27. december 1996-imi attaveqarfigeqqippaa, pisortallu ikiorsiissutaannik ikiorserneqarnissani qinnuteqaatigalugu.

Allattukkanut ilassummi imatut allassimasoqarpoq:

“Ulloq taanna pineqartoq saaffiginnippoq, pisartakkamininngooq aallerluni peq-qittussaagami.

Ilisimatinneqarpoq, K1-imiit pisartagaqanngimmat, aammalu K3-miit akuersisut peqqaartinnagu, pisartagassanik tunineqarsinnaanngitsaq, tamannalu nammineq ilisimaqqissaarmagu.

K3-p piumasaraa, K3-mut utissappat, inertik tigoqqinniarneraa, attartortut isumaqatigalugit, imaluunniit periarfissarigaa, qaammatit pingasut qaangiuppata, INI-mut allagaqareernermit, utertissinnaagaa. Tamanna akinagu, erseqqissaannarpaa, uteqqeqqusugani uimi ilaqutaasa ajortumik pisarmanni, soorlu uimi qatanngutaata inoqanngitsutsik iserfigalutik, nerisassanik tillinniarfigisimmatsik aammalu isiinnarlutik neriniarfigisarlutik.

Ajornartorsiutit tamakku, tikillugit suliasarimmagit, maanngaaniit uagut akuleruffigisinnaanngilagut.

Nassuujaanneqarpoq uternissaminut akuersinngippat, ikiorsiissutunik, tunineqarsinnaanngitsaq, tamanna K3-mit piumasagaataammat aammalu BORGMESTER-ip sianerfigereermagu, ajornartorsiutit K kommuneni allaniit pilersitaq, maanga kommunemut pisuussutigittinniarneqarsinnaanngitsaq.

Aalijangersimavoq K3-mut utiinnarniarluni, kisiannili tupigalugu K2-miit, oqarfigineqarsimagami iluamik ikiorluarneqaruni sukkasuumik maani initaarsinnaasooq. Tassunga tunngatillugu nassuujaanneqaqqippoq, suliasaq ingerlaffissamigut inger-

laqqaarluni, aatsaat tamakkua anguneqarsinnaasut, imaanngitsoq puttutiinnarluni oqaannarluni naammassissasut.

Pineqartoq akuersivoq angerlarnissaminut, aatsaalli tamanna pisinnaasoq, nalliutut qaangiuppata. Ukiortaami aggeqqinniarpoq, K3-mut paasiniunneqarpoq, pisartakkanik qanoq annertutigisumik pissanersoq, billet-mullu, qanoq inissisimanersoq.”

K3-p telefaxikkut allakkat imatut oqaasertallit 3. januar 1997-imi K1-imut nassiuppai:

“Qulaani pineqartoq pillugu oqarasuaatikkut qinnuteqaammut akuersissutigineqarnera uppenarsarlugu nalunaarutigissavara, pineqartoq K1-imit K3-mut umiarsuakkut akikinnikkut angalanissaanut akuersissutigineqarmat, ilanngullugu ilaqutariit inuussutissaanut sap.ak. tunniunneqassaaq ilisimatinneqarlunilu aatsaat taasuma kingorna ikiorserneqaaqqissinnaasoq. Maanga mellemregnerneqassapput.”

K1-ip suliamut oqaaseqaatigallagai 1. september 1997-imi tigusakka, pissutsinut misissuininnut ilaatinneqartunut tunngassuteqartut, imatut nipeqarput:

“... Ombudsmandip allagaa K1-imi Inunnik isumaginnittoqarfiup ulloq 11.7.-1997 tiguarput. Peqquneqarnerpullu tunngavigalugu inussiarnersumik K1-imi inunnik isumaginninnermi allaffimmiit ilisimatitsissutigissavarput, A K1-imiinnerata nalaani, nov. 1996-i naalersoq suliarineqarmat K3 aammalu K2 suleqatigalugu.

A K3-mut angerlartinneqarpoq ulloq 3.1.1997 K3-mi inunnik isumaginninnermi allaffik aqutigalugu, K3-mi inissaqartinneqarmat, aningaasatigullu ikiorserneqartarmat. A K1-imiiginnarusukkaluarpoq, aammalu sulissutigalugu nuunnissani K1-imut.

...”

K1-ip tusarniaanermut akissutaani 11. juni 1998-imi tigusanni imatut allassimasoqarpoq:

“Matumuuna K1-imi inunnik isumaginnittoqarfik sinnerlugu suliamut tunngatilugu imatut saqqummiussaqaarsinnaavugut.

Siullermik ajuusaarutigissavara sullissisuusimasut tamarmik suliunnaarnikuummata saagimi takusinnaasagut aallaavigalugit suliaq saqqummiussinnaagatsigu.

* Apeqquut siulleg imatut akisinnaavarput. K3 itigartitsissummik tunniussisimavoq kisiannili allakkaminni inatsit suna pineqarnersoq allassimanngilaat.

* Takusinnaasakka aallaavigalugit itigartitsissut oqaasiinnakkut tunniunneqarsimagunarpoq, allaganngorlugu tunniunneqarsimasinnaanerani takussutissartaqanngilaq.

* K3-p allagai aallaavigineqarsimasutut ilisimatitsissutigineqarsimaneri ilimagisinnaavara, taamatummi ilisimatitsineq allaganngorlugu tunniuttartussaagatsigi sulianut tunngatillugu.

* Naammagittaalliornissamat aqutissat sueneri pillugit ilitersuunneqarsimasinnaanerani saagian takusaqaarsinnaanngilanga.

Suliamut tunngatillugu saagiata kopi ilissinnut nassiuppakka itinerusumik misisorneqarsinnaaneranut atorneqarniassammata. Annertunerusumilli pisariaqartitsisoqassagalarpat ataanik atsiorsimasoq attavigisinnaavarsi, ajuusaarutigissavara kukkussuteqarsimasinnaanerput saagianimi suliap ingerlasimanerani ilaatigut eqqartorneqartut takusinnaannginnakkit.”

Tamatuma kingornagut K1 pillugu naammagittaalliummut ima oqaaseqaateqarsimavunga:

“Pisortat ikiorsiissutaannik tunineqarnissamik itigartinneqarneq pillugu naammagittaalliummut:

...

A-p aalajangiisimanerit pillugit naammagittaalliuunni oqartussaasumut, naammagittaalliummik suliaqarnissaminut pisinnaatitaanngitsumut tunniussimammagu, tamatumunnga peqatigitillugu kommunip oqaasiinartigut 1996-imi 10. aamma 27. decembarimi pillugit aalajangiineri A-p naammagittaalliuutaa, matumani aamma A-p K1-imiikkallartilluni isumaginninnermi ikiorsiissutinik ikiorserneqarsinnaannginneranik kommunip aalajangiinera ilanngullugu, oqartussaasumut naammagittaalliorfissamut, suliap suliarinissaanut ullumikkut pisinnaatitaasumut, tassalu Isumaginninnermi Naammagittaalliuuteqartarfimmut ingerlateqqissimavara.

Suliassap suliarineqarnermini qanoq inerneqarnerumaarneranik ilisimategqullunga naammagittaalliuuteqartarfik qinnuigisimavara.

Suliami matumani, naammagittaalliuuteqartarfiup suliassamik suliarinnissaata utaqqimaarnerata saniatigut, A-p naammagittaalliuutaa pillugu allatigut iliuuseqaqqissanngilanga.

K3-mi ineqarniarnermut tunngasut pillugit naammaginannngitsumik ilitserorneqarsimaneq pillugu naammagittaalliummut:

A-p uannut naammagittaalliummini oqaatigaa K1-imi isumaginninnermik ingerlatsivimmit 30. december 1996-imi ilisimatinneqarsimalluni K3-mi inigisaminut, maannamut attartortikkallarsimasaminut, iserteqqissinnaalluni.

Tamatumunnga peqatigitillugu ilisimatitsissutigaa K1-imi isumaginninnermik ingerlatsivimmit paasitinneqarsimalluni K3-p K2 9. december 1996-imi allakkatigut qinnuigisimagaa K3-mi inigisaata attartortinneqarneranut isumaqatigiissut attatiinnarneqassanersoq paasinarsisinniaqqullugu, kisiannili allakkat taakkua, siuliini issuaavigisimasama, imaannik nammineq paasitinneqarumanerminik itigartinneqarsimasoq. Tamatuma kingorna K3-mi isumaginninnermik ingerlatsivimmit ilisimatinneqarsimavoq allakkat taakku akineqarsimannngitsut.

Isumaginninnermik ingerlatsiviup allattugaataani 10. december 1996-imeersumi, siuliini issuarsimasanni, oqaatigineqarpoq K3-mi inigisaata allamut attartortinneqarallarnera 1. april 1997 aallarnerfigalugu atorunnaarsinneqarsinnaasoq.

Tamatuma kingorna ilisimatitsissutigineqarpoq, soorlu aamma isumaginninnermik ingerlatsiviup allattugaataani tamanna siuliini issuaavigineqartoq, A kommunimit 27. december 1996-imi ilitserorneqarsimasoq, oqarfigineqarsimasorlu inigisaminik attartorallartut isumaqatigiissuteqarfigalugit imaluunniit qaammatinik pingasunik periarfissaqartitsilluni K3-mi inigisani tigoqqissinnaagaa, A-p imaaliillaannaq kissaatigisimanngilaa, ingerlatsivillu nangilluni ilisimatitsisimavoq, ineqarnikkut ajornartorsiutaata aqqinnissaanut ikiornissaa kissaatigineqanngitsoq.

Aammattaaq kommuni oqaaseqaatimini 1. september 1996-imi tigusi-masanni ilisimatitsissutigaa "A K3-mut angerlartinneqarpoq ulloq 3.1.-1997 K3-mi inunnik isumaginninnermi allaffik aqutigalugu, K3-mi inissa-qartinneqarmat".

Tamatuma kingorna isumaqarpunga A K3-mi inigisami allamut attar-tortinneqarallarnera pillugu isumaqatigiissummi atorunnaarsinneqarsin-naanissaanut periarfissaminik pingaarnerusutiguinnaq ilitersorneqarsima-soq.

Kisiannili A-p isumaa malillugu K3-p allagaanik 9. december 1996-imeersunik paasitinneqarnissaminik qinnuteqarnera ingerlatsivimmit iti-gartinneqarsimavoq, tamannalu K1-ip akerlilersimannigilaa. Aammattaaq K1-ip uannut ilisimatitsissutigisimavaa ingerlatsivik isumaqarsimasoq A uterfigisinnaasaminik K3-mi ineqartoq. Taamaattumik tunngaviutippara A K1-imit aallaruni K3-mi inigisaminut utersinnaasutut paasineqarsinnaa-sumik ilitersorneqarsimasoq.

Pisortanit ikiorsiissutit pillugit Inatsisartut peqqussutaanni nr. 10-mi, 1. november 1982-imeersumi § 11 naapertorlugu kinaluunniit isumaginninner-mut ataatsimiititamit atugarisamigut patajaallisaavigineqarnissaq siuner-taralugu immikkut itumik imaluunniit ikiorsiissutinut allanut atasumik si-unnersorneqartussaataallunilu ilitersorneqartussaataavoq.

Aalajangersakkamut tassunga oqaaseqaatini imatut allassimasoqarpoq:

"Ileqqoreqqusami maanna atuuttumi ileqqoreqqusap siunertaatut taaneqarsima-voq isumaginninnermi ataatsimiititat pisariaqartitsineqartillugu siunnersuisinnaa-sassasut aammalu taamaaliorsinnaaneq allaffiit suliamik suliarinninnerattut pis-susissamisoortutut isigineqassasoq. Isumaginninnermi iluarsaaqqinnissamut kom-missionip tikkuarppaa pisariaqartuutilluinnarini pitsaaliuilluni sulinerup nakussas-sarneqarnissaa. Kissaatigisaq tamanna siunnersuummi anguniarneqarpoq siunner-suineq ikiorsiissutit aningaasanik ikiorsiisarnertut isigalugu, aammalu ikiorsiine-rusoq innuttaasup kissaatiginartitaa."

Isumaqarpunga isumaginninnermut tunngasuni ikiorsiinissamut ilitser-suinissamullu pisussaaffeqarneq taanna suliassat suliarineqartarnerat pil-lugu inatsimmi § 7, imm. 1 naapertorlugu aammattaaq ingerlatsinermi ileqqorissaarnissaq eqqarsaatigalugu ilitersuisussaataitanermit, oqartus-saasut pisussaafigisaannit, annertunerujussusoq.

Suliami pineqartumi matumani, A-p K1-imi najugaqaannarnissaminik imaluunniit K3-mut nuunnissaminik isumaliutersuutaanut tunngatillugu, pisortanit ikiorsiissutit pillugit Inatsisartut peqqussutaanni § 11 naapertor-lugu pisussaaffeqarnerup nassatarigaa, A allamut attartortitsigallarnek pillugu isumaqatigiissutit eqqartorneqartup atorunnaarsinneqarnissaanut pisortatigoortumik periarfissaannaanngitsut pillugit ilitersorneqarsima-sariaqaraluartoq.

Isumaga malillugu pisortanit ikiorsiissutit pillugit Inatsisartut peqqus-sutaanni ikiorsiinissamut ilitersuinissamullu immikkut pisussaaffeqarne-rup kingunerisaanik annikinnerpaaffittut A-p K3-mi isumaginninnikkut pissutsit atukkat tunngavigalugit, initaarniarnissaminut periarfissat il-

lua'tungiliussassat pillugit ilitsersorneqarsimasariaqaraluarpoq aamma, tamanna kissaatigiguniuk, inigisaminik allamut attartortitsigallarnermi atorunnaarsinneqarnissaanut kommunilu aqutigalugu inissarsiornissaminut pisariaqartumik allakkanik allagaqarnissaminut ikiorserneqarnissaminik neqeroorfigineqarsimasariaqaraluarluni.

Isumaginninnermut tunngasuni ilitsersuinissamut annertusisamik pisussaaffeqarnikkut innuttaasup pineqartup atugaanik patajaallisaanissaq siunertaamat, ingerlatsivik pisussaaffeqarsimagaluarpoq ineqarnikkut atugasaanik naleqquttunik A ilitsersussallugu, taamaalilluni A illoqarfimmi sorlermi najugaqaruni pitsaannerusunik atugaqarnissaminik nalilersuisinnaanissaminut naammaattumik tunngavissaqalersinnaaqqullugu.

Matuma kingorna uanga isumaga malillugu ingerlatsiviup A K3-mi inissaqarniarnera pillugu inatsisinik unioqutitsissanngikkuni ikiorserlugulu ilitsersunngitsoortussaangilaa, inissamik innersuussinissamut pisussaaffeqarnerup K3-miinnera innersuussutiginnarlugu.

Akerlianilli K1, tamatuma pisariaqarnera naapertorlugu, K3-mit paasissutissanik pisariaqartunik paasiniaanissaminut pisussaaffeqarsimagaluarpoq.

Tamatuma kingorna A, K3-mut aallassagaluaruni, ineqarnikkut qanoq atugassaqarnerminik pisortanit ikiorsiissutit pillugit Inatsisartut peqqusutaanni § 11 naapertorlugu naammaginartumik ilitsersorneqarsimasorinanngilaaq, tamannalu pitsaanngilluinnartuusoraara, tassami aamma naammaginanngitsumik ilitsersuisimanerup ilisimatitsissutigineqartut malillugit A-p 5. januar 1997-imi K3-mut aallarnissaminik aalajangersimanageranur pisutaqaataasimanera pingaartikkakku.

Matuma kingorna naammagittaalliuutip tassunga tunngasortaa pillugu annertunerusumik qanoq iliuuseqaqqissanngilanga.”

K2 pillugu naammagittaalliummik suliarinninninni misissuinerit makku ilaatinneqarsimapput:

7. juli 1997-imi kommuni qinnuigaara isumaginninnermik ingerlatsiviup suliaataa uannut nassiuteqqullugu, naammagittaalliuutip uannit misissorneqarnissaanut naammattumik pissutissaqalersitsinerata naliliivigineqarnissaa siunertaralugu.

Kommunip suliami allagaatai 24. juli 1997-imi tiguakka.

Tamatuma kingorna allakkatigit 29. juni 1998-imeersutigit kommuni nalunaarfigaara pissutsit makku naammagittaalliummit issuaavigineqartut misissuiffiginarlugit aalajangertunga:

Ajornartoorfeqarnermi ikiorserneqannginneq:

“26-27. okt. 96 meeqqagut inunnik isumaginninnermi sulisup ...-ip nammineerluni angerlarsimaffimmini paarisimavai, ataasinngornikkullu 28-ni okt. 96 meeqqagut tamaasa angutaanut angerlartillugit, uffa taama ajortigisumik isiginnaartuusimasut, ikiorserneqanngiivillugit. Allaat ...-ip klasselære-a paasiniaangaluarmat sooq ... taamma kamattalertinginersoq, akineqarsimavoq ... nipagersimasussaataitangami nammineq oqaaseqarsinnaanani.

Tassa aatsaat uanga K4-mit tikikkama ulloq 21. nov. 96 atuarfik attavigakku paasivaat qanoq pisoqarsimanersoq, imaappoq ... qaammat ataaseq pisariaqartitsisorujussuugaluartoq tarnimigut katsorsarneqarnissaminik ikiorserneqarsimanngilaq, qatanngutai ilanngullugit. (Uffa K2-imi tarnip pissusaannik immikkut ilisimasalimik peqartoq).”

A-p meeraanik angerlarsimaffiup avataanut inissinissaq pillugu naam-magittaalliuuteqartumit qinnuteqaammik suliarinnissimannginneq:

“K4-miinninni arlaleriarlunga inunnik isumaginninnermi sulisumut ...-mut sianertaraluarpunga uanga, toqqissisimanarinagu meeqqat angumminniinneraat, neriorsuinnartarpaanga uiga oqaloqatigissallugu, kinguneqartanngitsumik.”

A-p K2-mut 21. november 1996-imi tikinnerani ingerlatsiviup peqataa-nerani mianerinnissimannginneq:

“Tamakku pillugit Sanami nakorsama siunnersorpaanga Sanami inunnik isumaginninnermi sullissisumut saaffiginequllunga, taamaasiorpungalu, ingerlaannarlu sullissisoq K2-mi S-imut saaffiginnippoq, ilisimatinneqarlunili akuleruttut amerlavallassaqqimmata, uanga tikikkuma suliaq aallartikkumaartoq.

Tamaattorli K2-mukalerama Sana-mut sianerfigivaanga, uanga nammineq K2-mut tikikkuma taxarlunga uinnut angerlassasunga. Taamatut kalerrinneqarama anni-laangaarama qiaannalerlunga sajuttuinnanngorlunga iliuusissaarullunga taamaalior-tussaanasorileraluarpunga.”

aamma

“K2-mullu pivunga marlunngorneq 21. nov. 96 kl. 17.30. Politiinik aaneqanngi-langa, kisianni inuunnik isumaginninnermi sullissisoq ... kisimi takoqquvoq, assut ajunngisaarpoq oqarlunilu ingerlaannaq kommunip allaffianukassasugut uiga sag-sbehandlerialu ... tassani utaqqimmatigut.

Aperinngivillunga qa(n)oq innersunga, uffa ullup ilarsua angalanikuullunga qa-sulertunga kaallungalu, sulilu kigutikkut bøjleqartunga iluamik oqalussinnaananga, taleralu atorsinnaanngikkiga sulii gibseqarmat, meeqqannullu takorusuisunga, miittarfimmit ingerlaannaq inunnik isumaginninnermi allaffimmukaappaannga, uigagooq oqaloqatigissagakku.

Iseratta apersorneqarpugut takunerput qanoq misigisimaneeripput. Uanga nas-suaaniarsarivunga qanoq pineqarsimaninnut misigisimaneerlunga, kissaatiginerullu-guli meeqqakka kisimeeqatinginissaat, tamannalumi isersimaqatinnut paasitinniar-sarigaluarpara, imatullu namminneq inernilerpaat:

Uanga uigalu marluulluta meeqqat angerlarfigigutsigit pitsaanerusoq, oqarfiga-lutalu angerlarsimaffitsinnut ilagissaluta. Nal. 18.30 miss. tamatta angerlarsimaffit-sinnukarpugut, sagsbehandleritta 5-10 min, isersimaqatigeriarluta qimappaatigut.”

A-p qimarnguimmiissinnaanermut periarfissaanik tamakkiisuunngitsu-mik ilisimatitsissuteqarneq:

“Politiip qimarnguimmi sulisoq apersorpaa, meeqqat tamarmik qimarnguimmi inissaqarnersut, ilaanagooq inissaqakutsoorpunngooq, uffa in. isu. sulisup ... oqar-toq meeraq ataaseq kisimi inissaqartoq. Ulloq taanna meeqqakka tamarmik qimarnguimmut nooqatigivaannga sunamita ajorpa.

Arfininngorneq sapaallu ajunngitsumik aningorpagut.”

K2 kommunip oqaaseqaataa imaattoq 21. august 1998-imi tiguara:

“Naammagittaalliuut qulaani ineqartoq pillugu allakkatit 29. juni 1998-imeersut innersuussutigalugit makku matumuuna nalunaarutigisinnaavavut:

Siullermik oqaatigineqassaaq ... suliami matumani ingerlatsisuusimasoq, kisiannili 1. maj 1998-imi allamik suliffeqarlersimalluni, taamaattumik maaniigunnaarsi-mavoq, taamaammallu suliami matumani paasissutissanik amerlanerusunik tunise-

qataasinnaanani. ... pillugu oqaatigineqarsinnaavoq taanna taamani meeqqanik tassangaannartumik nukinginnartumillu tiguisartuusimammat, taamaattumillu suliami tassani akuutinneqarsimalluni. Taamaattumik ...-p meeqqat ulluni 26-27. oktober 1996-imi immiitissimavai.

Nanertuuteqarnerup nalaani ikiorsiisoqarsimannginnera.

Suliaq taanna isumaginninnermik ingerlatsivimmi 28. okt. 96-imi ullaakkut ataatsimiinermi oqaluuserineqarpoq, tassanilu tarnip pissusiinik ilisimasalik peqataavoq, naliliinermilu oqartoqarluni meeqqat ataavimminnit paarineqarluarsinnaasut. Naammagittaalliuuteqartummi eqqaamasariaqarpaa meeqqat ataataat imminermisut annertutigisumik angajoqqaatut oqartussaassuseqarmat, meeqqallu atugarissaarnissaannut akisussaaqataalluni. Taamaattumik isumaginninnermik ingerlatsivik naliliilluni isumaqarpoq meeqqat angerlarsimaffiup avataani angerlarsimaffimmut allamut/ paaqqinniffimmut taakkununga takornartaasumut inissinneqaratik ataaminniippata tamanna meeqqanut eqqarsartaatsikkut nanertuutaannginnerpaassasoq. ... pillugu atuaqatigiinnik atuartisisup paasisutissanik pisinnaasimannginnera nassuiaateqarfialugu oqaatigineqassaaq, atuartisisoq taanna ...-mut oqaasiinnartigut saaffiginnissimasoq, ...-lu akisimalluni meeraq taanna ilaqutaalu pillugit paasisutissanik atuarfik pissarsissappat atuartisisoq allakkatigut saaffiginnittariaqartoq, tassami paasisutissat allanut tunniunneqarnissaat pillugu angajoqqaatut oqartussaassuseqartut akuersissutaat pissarsiariniarneqaaqqaartariaqarmat.

Meeqqat angerlarsimaffiup avataanut inissinneqarnerat pillugu naammagittaalliuuteqartup qinnuteqaataata suliarineqarsimannginnera.

Isumaginninnermi siunnersorti ... naammagittaalliuuteqartup uianik oqaloqateqangaatsiartarsimavoq, naammagittaalliuuteqartorlu uppersarsaaserneqanngitsumik oqarpoq uninnganermi nalaani meeqqat qanoq atugaqarnerat isumaginninnermik ingerlatsiviup malinnaavigisimanngikkaa. Ingerlatsiviup angerlarsimaffik naliliiffigisimavaa, matumanilu meeqqat ataataat meeqqanik paarsisinnaasutut nalilersimalugu.

Naammagittaalliuuteqartup 21. november 1996-imi K2-mut tikinnerani ingerlatsiviup peqataanerani mianerisariaqartunik mianerinnissimannginneq.

Naammagittaalliuuteqartup K2-mut utinnginnerani ...-p oqarasuaatikku isumaqatigiissuteqarfigisimavaa K2-mut tikippat nammeneq aassagini.

Naammagittaalliuuteqartup uterluni K2-mut tikinnginnerani suliamik ingerlatsisup tarnip pissusiinik ilisimasalik oqaloqatigisimavaa, naammagittaalliuuteqartoq ...-mi uninngareerluni uterpat pisut qanoq aaqqinniarneqarnissaat eqqarsaatigalugu. Naammagittaalliuuteqartup tikinnerani periuuserineqartoq tassaavoq tarnip pissusiinik ilisimasallip suliamik ingerlatsisumut ilitersuutigisimasaa.

Naammagittaalliuuteqartup qimarnuvimmiissinnaanerinut periarfissaqarneranik paasititsisimannginneq.

Iluoorpoq qimarnuiup nalunaarutigisimammagu anaanaq meearlu ataaseq kisiinik inissaqartinneqartut, kisianni qimarnuik ersarinnerusunik paasitinneqarami suliniuteqarpoq naammagittaalliuuteqartoq qitornaalu tamaasa tigusinnaajumallugit. Isumaginninnermi siunnersorti naammagittaalliuuteqartup qimarnuimmut inissinniarnernani peqataasoq nalunaaquttap-akunnerata missaani naammagittaalliuuteqartoq qimarnuimmeeqatigereeramiuk aatsaat anivoq.

Naggataatigut oqaatigineqarsinnaavoq isumaginninnermik ingerlatsiviup naammagittaalliuuteqartoq nanertuuteqarnerani ikiorneqarnissaanik neqerooruteqarfigisimagaa, pineqartulli ikiorserneqarnissani piumasimanngilaa, illoqarfimmiillu sapinngisamik piaarnerpaamik aallarnissani soqutiginerusimallugu.”

Allakkatigut 2. november 1998-imeersutigut A K2-p oqaaseqaataanut oqaaseqaateqarnissaanut periarfissippara.

A tamatununga atatillugu oqaaseqaateqanngilaq.

A-p meeraasa angerlarsimaffiup avataanut inissinneqarnerisa isumagin-ninnermik ingerlatsivimmit suliarineqarnera pillugu K2 amerlanerusunik paasissutisseqqullugu 29. marts 1999-imi qinnuigaara.

Paasissutissat taakku 30. marts 1999-imi tiguakka.

Tamatuma kingorna K2-mik naammagittaalliuut pillugu ima oqaaseqaateqarsimavunga:

“Nanertuuteqarnerup nalaani ikiorsiisoqarsimannginnera pillugu naammagittaalliuummot:

Suliami tassani kommunip akissutaa imatut paasivara A kisimi, tassalu meeraip pinnatik, suliap kommunimit suliarineqarneranut atatillugu nanertuuteqarnerup nalaani ikiorserneqarnissaminik neqeroorfigineqarsimasoq.

Isumaqarpungali pisumi matumani A-p meeraanut angerlarsimaffiup avataanut 26. aamma 27. oktober 1996-imi inissiinikkut ikiorsiiniutigineqarsimasunit annertunerusumik ikiorsiiniuteqartoqarnissaa isumaliutersuutigissallugu kommuni tunngavissaqarsimasoq.

Tassunga oqaatigaara suliami kommunip oqaaseqaataa imatut paasariaqariga meeqqanut ikiorsiiniutissat atorneqalernissaannik kommunip naliliinermi meeqqat piffissami sivisunerusumi angerlarsimaffiup avataanut inissinniarneqarnissaannut tunngavissaqarnerisooq kisiat isumaliutersuutigisimagaa.

Isumaginnittoqarfiup meeqqanik inuusuttunillu ikiorsiinissamut pissaaffeqarnera pillugu malittarisassat tassaapput Inatsisartut peqqussutaata nr. 9-p 30. oktober 1992-imeersup nassatarisai.

Inatsisartut peqqussutaanni tassani § 8 malillugu meeraq, angajoqqaatut oqartussaassutsumik tigummiaqartoq imaluunniit pilersuisorpiaasoq pisuni ukunani ilitsersussallugu tapersersussallugulu isumaginninnermik ingerlatsivik pissaaffeqarpoq:

- “1) Meeraq inuusuttorluunniit pilersuisueruppat,*
- 2) pilersuisup pilersuineq isumannaatsumik isumagisinnaajunnaarsimappagu,*
- 3) meeraq inuusuttorluunniit ulluinnarni avatangiisinut, atuarfimmot imaluunniit inuiaqatigiinnut akulerunniarnermigut ajornartorsiuteqarpat,*
- 4) meeraq inuusuttorluunniit pisariaqartitsineq naapertorlugu paarineqanngippat,*
imaluunniit
- 5) meeraq inuusuttorluunniit allatigut naammaginngitsunik atugaqarluni inuuppat.”*

Isumaqarpunga pisumi meeqqap takkuani anaanaata annersarneqarsimanera, ataataasullu taamatut pinerluuteqarnini pillugu politiinut unnerluutigineqarsimanera ikiorsiiniutinik aallartitsisoqarnissaanik isumaliutersuuteqarnissamut qularutissaanngitsumik tunngavissaqalersitsisut.

Inatsisartut peqqussutaanni § 9 malillugu taamatut pisoqartillugu isumaginninnermi oqartussaasoq makku pillugit aalajangiisinnaavoq:

“1) Inuit ataasiakkaat ilaqutariilluunniit ataannartumik ilitersorneqarlutillu tapersorneqarnissaminnik neqeroorfigineqassasut, ataatsimiititarlu pisussaavoq ilaqutariit taamaattut ilitersorneqarnissamik tapersorneqarnissamillu pisariaqartitsisorinarluinnartut neqeroorfigissallugit. Iltersuineq tamanna inunniit suliasamat tamatumunnga piginnaassuseqarluareersunit ingerlanneqartassaaq,

2) pineqartumut siunnersuisussamik toqqaalluni, tak. kapitali 4,

3) meeraq inuusuttorluunniit nakorsamut kiisalu aningaasartuutissat taamaaliornermut attuumassuteqarluinnartut ikiorsiissutigissallugit,

5) pisortanit ikiorsiissutit pillugit Inatsisartut peqqussutaanni aalajangersakkat naapertorlugit angajoqqaatut oqartussaassuseqartup/pilersuisuusup napparsimnerani angerlarsimaffimmi suliasatigut ikiorsiinnermut imaluunniit ilaqutariinni qaangiutitertussamik ajornartorsiuteqartoqartillugu oqilisaassisumik aningaasatigut ikiorsiiffigalugit, imaluunniit

6) meeqqap inuusuttulluunniit angerlarsimaffiup avataanut ilaqutariinnut paarisassannortinnissaa isumagissallugu, atuarfik suleqatigalugu atuarfiup nerisaqarfigiitigalugu ineqarfittaaniittussanngorlugu, meeqqanik paaqqinniffimmiittussanngorlugu, napparsimmavimmiittussanngorlugu imaluunniit peqqissartarfimmiittussanngorlugu kapitali 5-imi aalajangersakkat malillugit.”

Oqaatigineqareersutut kommunip akissutaa imatut paasivara A-p meeraasa pisumi angerlarsimaffiup avataanut inissinneqarnerminnit sivisunerusumik inissinneqarnissaannut tunngavissaqarsinnaanersoq kommunip isumaliutersuutigisimagaa.

Isumaqaarpunga kommunip apeqqummik nalileereerluni meeqqap angerlarsimaffiup avataanut inissinneqannginnissaanik aalajangiisup nammineq suliniuteqarnermigut isumaliutersuutigisariaqaraa ikiorsiiniutit allat Inatsisartut peqqussutaanni § 9-mi taaneqarsimasut aallartisassallugit neqeroortigissallugilluunniit naleqquttuussanersoq. Matumani aamma isumaqaarpunga aalajangersakkami tassani ikiorsiiniutit nr.1)-4)-mi taaneqartut pisut qanoq innerat apeqqutaatillugu qinnuteqaatitaqanngitsumik akuersisitseqqaarnanilu ikiorsiissutigineqarsinnaassasut, taamaaliornissaq meeqqamut iluaqutaanerususaaq eqqarsaatigalugu pisariaqarpat, tak. Inatsisartut peqqussutaanni tassani § 10, imm. 1, imatut oqaasertalik:

“§ 10. Taamaallaat ikiorsiiniutissanik aalajangersaasoqarsinnaavoq tamakku meeqqamut inuusuttumulluunniit iluaqutaanerusussatut pisariaqarpata. Ikiorsiiniutit meeraq aamma angajoqqaatut oqartussaassuseqartoq imaluunniit alla meeqqamik paaqqutarinnippiartoq sapinngisamik suleqatigalugit iliuuserineqassapput.

Imm. 2. Ikiorsiiniuteqalersigani pissutsit suliamut pingaaruteqartut tamarmik qulaarneqaaqaassapput, soorlu atuarfiup, peqqinnissamut isumaginnittoqarfiup aamma allat pissutsinik iliuuserineqarsinnaasunillu ilisimasaqarnertik pissutigalugu pingaaruteqarsorinartut suleqatigalugit.

Imm. 3. Meeraq 10-nik ukioqalersimappat peqqussut manna malillugu ikiorsiiniutissanik aalajangiisinnani meeraq oqaloqatigineqaaqaassaaq. Meeqqat 10 inorlugit ukiullit pillugit paasissutissat meeqqap ikiorsiinnikkut eqqarsaatigineqartoq qanoq isumaqarfigineraa pigineqartassaaq, meeqqap inerisimatigissusiata suliallu qanoq ittuunerata tamanna ajornartinnikkaangassuk.”

Suliap qanoq issusia tunngavigalugu, matumani A-p K4-mi napparsimavissuarmi uninnganermi nalaani kommunimut saaffiginnissimanera aamma atuarfimmik ingerlatsiviup kommunimut saaffiginnissimanera ilanngullugit eqqarsaatigalugit, isumaqaarpunga A-p meeraasa angerlarsimaf-

fiup avataanut inissinneqarnissaannut taarsiullugu ikiorsiiniutaasinnaasunik kommunip misissuisimannginnera isornartorsiortariaqartoq.

Immikkut oqaatigissallugu pissutissaqarpunga Inatsisartut peqqussutaanni tassani § 4, imm. 1 malillugu inuk kinaluunniit pissutsinik isumaginninnermut ataatsimiititaliamit akuliuffigisariaqarsorinartunik ilisimasaqalersoq ataatsimiititamut nalunaaruteqarnissaminut pisussaaffeqartoq, kii-salu § 10, imm. 2 qulaani issuarsimasara malillugu atuarfiup isumaginninnermik ingerlatsivimmuut saaffiginnissutaata isumaginninnermik ingerlatsiviup pisumi tassani ikiuuttariaqanninnerluni isumaliutersuutigilissallugu pissutissaqalersimasariaqaraluartoq.

Meeqqami angerlarsimaffiup avataanut inissinneqarnissaannik A-p qinnuteqaataata suliarineqarsimannginnera pillugu naammagittaalliummut.

Kommunip uannut akissuteqarnerata kingorna tunngaviutittariaqarpa-ra A-p meeraasa angerlarsimaffiup avataanut inissinneqarnissaat kommunip isumaliutersuutigisimagaa, kisiannili kommuni naliliisimasoq Inatsisartut peqqussutaanni § 9, nr. 6) malillugu taamatut aalajangiinissamut tunngavissaqanngitsoq.

Kommuni imatut paasivara pissutsit makku pingaartillugit isiginiarneqarsimasut:

-Meeqqat ataataminni najugaqaannarnissaminnut sanilliullugu angerlarsimaffiup avataanut inissinneqarnermikkut tarnikkut nanertuuteqalernissaannik oqimaalutaaneq,

-ataataasoq meeqqanik paarsisinnaasutut isigineqartoq, aamma

-ataataasup angajoqqaatut oqartussaasuseqarnermik tigumminnittutut akisussaaqataanera pisinnaatitaaffiilu.

Qulaani taaneqartuni siullermi aappaannilu oqaatigineqartutut kommunip naliliinera isummerfigisinnaanngilara.

Ataataasup angajoqqaatut oqartussaassusermik tigumminneqataanera kommunip naliliinermi ilanngussimmamagu isornartorsiortariaqartutut isigaara.

Taamaattumik meeqqamut iluaqutaanerusussaq eqqarsaatigalugu taamaaliornissaq pisariaqarpat meeqqap angerlarsimaffiup avataanut inissinneqarnissaa kommunip aalajangertussaavaa.

Taamaalilluni meeqqap angerlarsimaffiup avataanut inissinneqanninnernissaannik angajoqqaatut oqartussaasuseqartup soqutigisaqarnera suliamut attuumassuteqanngilaq, tamatumuunakkullu inatsisinik unioqquitsinikkut tunngaviulluni, meeqqamut iluaqutaanerusussaq eqqarsaatigalugu taamatut inissiinissaq pisariaqassappat.

A-p K2-mut 21. november 1996-imi tikinnerani ingerlatsiviup peqataanermi mianerinnissimannginnera pillugu naammagittaalliummut.

Kommunip akissutaa imatut paasivara A-p suliamik saqqummiussinera kommunip assortunngikkaa, tassa K2-mut tikinnermini isumaginninnermik ingerlatsivimmi sulisumit aaneqarsimalluni, tamatumalu kingorna kommu-

nip allaffianukaanneqarsimalluni, ataatsimiinnermi aamma uimi peqataaffigisaani peqataanissani siunertaralugu.

Aammattaaq kommunip akissutaa imatut paasivara kommunip A siumut isumaqatigiissuteqarfigereersimagaa K2-p mittarfianut tikinnerani kommunip sulisuanit naapinneqassasoq.

Kommunitaarlu akissutaa imatut paasivara isumaginninnermik ingerlatsivimmi A-p uiata aamma peqataaffigisaanik ataatsimiinnissaq pillugu kommunip A siumut ilisimatereersimanngikkaa, kommunimilu tarnip pissusiinik ilisimassallip taamaalioqqusinera kommunip sulisuata malissimagaa.

Tamatumunnga atatillugu oqaatigaara pisortani oqartussaasut innut-taasunut eqqortumik mianerinnittumillu pissusilersussallutik pisussaasut.

Tamaattumik isumaqarpunga A-p K2-mut tikinnerata kingunitsianngua-tigut isumaginninnermik ingerlatsivimmi ataatsimiinneq kommunip aaq-qissuussimasariaqanngikkaluaraa, taamatut periuseqarniarnermik A-p paasinninnera qulakkeeqqaarsimatinnagu.

Naammagittaalliortup qimarnguvimmiinnissamut periarfissaa pillugu amigartumik ilisimatitsisimaneq.

Kommunip akissutaa imatut paasivara qimarnguvimmi inissat pillugit kommunip misissuinini tunngavigalugu A ilisimatissimagaa, qimarnguillu kommunip siullermeerluni saaffiginninnerata kingorna A-mut meeraanullu aatsaat inissaqartitsilersimasoq.

Taamaattumik kommunip A-mut ilisimatitsissuteqarnermini periaaseri-simasaa isornartorsiussallugu naammattumik tunngavissaqanngilanga.

Naggasiutaasumik oqaaseqaatikka.

Isumaginnittoqarfiup aqunneqarnera aaqqissuussaanelu pillugit Inat-sisartut peqqussutaanni § 1 malillugu Isumaginninnermut Suliffeqarner-mullu Pisortaqarfik kommunit isumaginninnermi malittarisassanik aqutsi-nerat nakkutigissallugu pisussaammat allakkat uku assilineri pisortaqar-fimmut ilisimatitsissutitut nassiuppakka, suliap ingerlasimaneranut atatil-lugu annertunerusumik iliuuseqartoqassanersoq pisortaqarfimmit nalilii-vigineqarnissaa siunertaralugu.

Suliami annertunerusumik iliuuseqartoqassappat ilisimateqqullunga pi-sortaqarfik qinnuigaara.

...

A-p naammagittaalliuutaanut atatillugu aamma annertunerusumik ili-uuseqaqqissanngilanga.

Isumaginninnermi Naammagittaalliuuteqartarfiup tamatuma kingorna nalunaarfigaanga K1 pillugu naammagittaalliummi Naammagittaalliuute-qartarfik aalajangiisimasoq.

Naammagittaalliuuteqartarfik aalajangersimavoq suliaq K1-imut sulia-reqqitassanngorlugu utertinneqassasoq, tassami kommuni A-p pisortanit ikiorsiissutinik ikiorserneqarnissaminik qinnuteqaata pillugu erseqqissu-mik naliliissammat.

Naammagittaalliuuteqartarfiup A-mut aalajangiinnerminut atatillugu erseqqissarlugu oqaatigisimavaa “kommunit akornanni aaqqiagiinnginnerit pisortanit ikiorsiissutinik qinnuteqaativit itigartinnissaanut imaluunniit pisortanut ikiorsiissutinik ikiorsiiumannginnermigut pinngitsaalillutit nuut-sinneqarnissannut tunngavilersuutaavoq inatsisinik unioqqutitsisoq.” (A-torfeqarfimmi nutsigaavoq.)

Tamatuma kingorna K1 qinnuigaara Naammagittaalliuuteqartarfiup aalajangiineranut atatillugu kommuni qanoq iliuseqarnerseqqallungu.

K1 ukiup nalunaarusiuunneqartup naanerani suli akissuteqanngilaq.

Isumaginninnermut Suliffeqarnermullu Pisortaqarfimmut 12. december 2000-imi ima allappunga:

“K2-p suliamik suliarinninnera pillugu oqaaseqaatinnut 19. september 2000-imeersunut immikkoortortaqarfiup oqaaseqaatai 5. december 2000-imi tiguakka.

Immikkoortortaqarfiup oqaaseqaatai imatut paasivakka kukkunerit K2-mik isornartorsiuinissannik pissutissaqalersitsisut pilertannginnissaat immikkoortortaqarfiup siunissami eqqumaffiginiaraa.

Taamaattumik suliama matumani Isumaginninnermut Suliffeqarnermullu Pisortaqarfik eqqarsaatigalugu annertunerusumik iliuseqaaqqinngilanga, suliarmi taanna pisortaqarfiup isumaginninnermut tunngasuni nakkutilliinnermik suliaqarnera tunngavigalugu allakkatigut 19. september 2000-imeersutigut pisortaqarfimmut nalunaarutigigakku.

Kiisalu oqaatigaara Immikkoortortaqarfik isumaqartoq suliap A-mut tunngasup suliarineqarnerani K2-mi sulisoq ... peqataasinnaassuseqarsimanngitsoq.

Taamaattumik paatsuungasoqaqqunagu malugeqquara apeqqut taanna sulianik suliarinninninni ilaasimanngimmat.”